

AUTONOMIIS » LA RIFORME

Tirâ vie lis Provinciis e multiplicâlis par cuatri

L'ent storic al varà di lassâ il puest aes Unions dai Comuns

di Giuseppe Mariuz

Lis Provinciis a àn, te nestre storie, un pès identitari no indifarent. La Patrie dal Friûl, che dal Judri e rivave ae Livence, e veve une sô flape autonomie ançe dentri de Republiche di Vignesie; une volte sparide la Serenissima e passade la buriane napoleoniche, e diventà *Provincia del Friuli* - cence il Distret di Puart - dentri dal Regno Lombardo-Veneto sot de Austrie. E cussì e je restade cul passaç ae Italie, cul non di *Provincia di Udine*, fintremai al 1968, cuant che Pordenon, dopo plui di vincj agns di bataiis, e rivà a distacâsi puartantsi vie la Diestre dal Tiliament.

Pier Paolo Pasolini, ta un articul su *Libertà* dai 6 di Novembar dal 1946, si jere dit contrari no a une semplice autonomie amministrative ma a une provincie che e distruezès l'*ubi consistam* furlan, fasint doventà il teritori jenfri Livence e Tiliament «anfibio e amorfo, sprovvisto di coscienza e di passato». A soreli jevât, la Provincie di Gurize, erede de imperiâl Contea Princesca di Gorizia e Gradisca, e à mantignût un fuart spirt autonomistic ançe dopo la pierdite dai teritoris slovens, cul sospiet che i sucedès une altre volte di vignî scancelade, come dal 1923 al 1927.

Fat al è che, dopo Pordenon, tai ultins agns in Italie a son spontadis tantis altris Provinciis, dispès inventadis e cence storie, par slargjâ la burocrazie e fâ mangjâ i politicants e duj chei che i stan torator. Cuanche al è saltât fûr il discors de lôr sopression, un citadin medi furlan al podeve duncje pensâ che, di une bande, al jere un pierdi di identitât storiche, ma di chê altre bande si podeve tirâ un su-



Una cjarde de Patrie dal Friûl gjavade fûr dal Atlant di Mercatore dal 1619

spîr. Bastave sierâ la sede des Provinciis, vendi i palaçs, lassâ a cjase i politics, proviodi di spartî lis competencis jenfri Comuns e Region, tignî dome il personâl che al covente e liberâsi di une sdrome di dirigjents che a costin un voli dal cjâf. E magari, di chê strade, ançe unî i Comuns piçui, si ben che la int e fasedi fadie a distacâsi dal cjampañil.

Nol fos mai dit! Se pai Comuns al covente un referendum, al puest des vieris Provinciis si à proviodût di meti sù lis Unions dai Comuns, ents di secont grât (par disi che no ju vote il popul) e par proponil si à nomenât un Consei di sindics clamât Cal. Si fevele bielzà di - plui o mancul -

disieset Unions di Comuns che a varan di vè ognidune un so dirigjent gjenerâl (duncje 17 al puest di 4 di prime) e par President un sindic che salacor al varà dirit a une indenitât in plui di chê ch'al cjape tal so Comun. Ma a coventin ançe un *Osservatorio* regionâl su la riforme, Comissions consultivis jenfri i Comuns, *Subambiti* (cemût clamâju par furlan?) dal teritori, *una Centrale unica di committenza* e vie inde nant. E dut chest par fâ partî la riforme tal 2017. Cualchi ufici di studis al à bielzà calcolât che lis spesis si jevaran; l'assessor regionâl, al contrari, al garantîs - su la peraule - che si podaran sparagnâ 30 milions ogni an.

La prime des Provinciis che e pare indenant la riforme e je chê di Pordenon. Chest an, ae scjadince dal mandât, i citadins no son stâts clamâts a votâ. Lis urmis si son viertis inveziit pai conseirs comunai e, dopo de elezion al è doventât president Claudio Pedrotti, che duncje al varà su la schene tal stes timp la Provincie e il Comun plui impuartant.

Tal proget gjenerâl di riforme discutût in consei regionâl e je stade ançe aprovade a largje maiorance la istituzion des Assembleis des minorancis lenghistichis par fâ in mût che tes Unions di Comuns si tegni cont de int che e fevele sloven, furlan e todesc.

© RIPRODUZIONE RISERVATA



San Nicolau al torne pai fruts ogni an pai sîs di Dicembar

TRADIZIONS

Il vescul Nicolau, il sant dai fruts cun tantis gleseutis in Cjargne

di Celestino Vezzi

San Nicolau nus clame a memorie di cuant che da piçui la vee si meteve sù pa basse dal balcon il scarpet o la çuculute e si la mocave tal jet passant cu la fantaisie su ce che il Sant, cence fâsi viodi, nus varès puartât secont il merit di ognun. Jessint in tancj in famee, la basse si emplave di une rie encje di sis-siet çuculas o scarpets, ci cu la ponte fruvade e ci cu la tomerè sbusade, il dut netât a la miei par no presentâ al Sant alc di maldert, nol varès parût bon!

Che i cjase nus pituravin il Sant come un grant vecjo cu la barbe, vistît da vescul cun tant di mitrie che si judave tal cjaminâ cul pastorâl: ma cemût fasevial a entrâ pas cjasas cence fâsi viodi e sintî? Un misteri...

Si jovave a binore cu la gole di cucâ e tal stes timp, se si ere un tichinin masse indâts, cu la poure di cjatâ une grampe di boras studadas o une bachete di puvigne; cuant che no ere la bondanse dal di voi ai lusive i vôi da contentece tal cjatâ un mêl, dôs coculas e cualchi nole e encje se ai ere compagns di chei dal desc ta cjanive ai veve dut un âti savôr.


I tims son mudâts e San Nicolau voi al rive cu la sô mundure di Vescul cun tant di louge dai regâi di ogni sorte e misure tirade dai aiutants; a Tamau al rive jù dal bosc bandît cui giovins che i fasin lûs pal troi, a Çurçuvint al ven di-

retamenti tas scuelas in grazie dai donadôrs di sanc, a Paluce sore sere al è in place San Jacum e cussì in tancj paisuts.

Dongje dai regâi nus reste voi, in Cjargne, un biel numar di gleseutas e di pais che ai riguardin il Sant: Liussûl, Vuegos di Rigulât, Cjalina di Davâr, Cjanive di Tumieç, Damâr, Cjaicas di Vergegnas, Comelgjans, Algiers di Darte e Maiâs di Denemonç. E domandi perdon se cualchidune a è fuide!

Vin da giontâ che a Paluce i vin une gleseute, San Nicolò di Lauzane, sconscradade e sede dal Circul culturâl, riguardade inmò tal 1327 tal testament di Manno, prevost di San Piêri di Zui; ta taviele di Sûdri inmò un *San Nicolò* cuntune storie particulâr. La liende populâr a conte che viers il 300 un cert Caio Curcio Lino da Bari, tai siei pais, al veve une locande dulâ ch'al servive cjarn di cristian. Une bielee di al passe ai propit San Nicolau che al ressusite duj i copâts e al invade al pintiment Caio Curcio Lino; l'om convertît, al scjampe a condane bandonant il pais e sielgint di fâ l'eremite Sûdri che lui al riguardave cun plasei tai tims che cassù al veve fat il soldât. Ma passât cualchi an i nemis lu cjatin e lu tornin a menâ a Bari, ma si conte che prime di lassâ Sûdri al veibi consegnât, par salvâ la sô anime, une borse di bêçs ai Sudreis par fâ su une gleisje in onôr dal Sant Vescul di Mira.

(varietât di Çurçuvint)



Gian Giuseppe Liruti

Leterâts, artiscj e socestants dal Friûl

Vuê in Filologjiche si presente il proget che al puarte indenant il "Gnûf Liruti"

Vuê, aes 4 e mieze là de Societât Filologjiche Furlane a Udin in vie Manin al varà lûc il 'seminari *Friulani illustri, tra biografie e prospettive di ricerca*, cul patrocinio de Deputazion di Storie Patrie pal Friûl e dal Dipartiment di Studis umanistics de Universitât dal Friûl. Il 'seminari - che al sarà moderât di Lilianna Cargnelutti - al sarà une ocasion par ilustrâ i risultâts passâts dal proget *Gnûf Liruti* e i siei gnûfs disvilups. Cesare Scalon e Claudio Grig-

gio a fevelaran dal risultât primari dal proget, ven a di i nûf volums dal *Nuovo Liruti. Dizionario Biografico dei Friulani* (Forum, 2006 - 2011), che, cu lis sôs plui di siet mil pagjinis e doi mil siscient vôs, al è un imprest di fonde par cognossi lis vitis e la bibliografie dai Furlans plui impuartants da l'Ete di Mieç al di di vuê.

Scalon e Griggio a pandaran ançe i rapuarts jenfri il *Nuovo Liruti* e la opare mestre di Liruti, *Notizie delle vi-*

te ed opere scritte da' letterati del Friuli (1760-1830). Matteo Venier al considerarà lis pagjinis dal Liruti su la famee Amalteo, che l'innomenât pitôr Pomponio (1505-1588) a 'nt fo part. Jenfri il Cuatri e il Siscent, la famee Amalteo e ve ançe cetancj significants umaniscj e poetis (soredut par latin), che di lôr Venier al è daûr a meti in vore une antologjie pe golaine dai leterâts di là da l'aghe publicade de Academie San Marc di Pordenon. Tal ultin, cui ch'al scrîf-

al fevelarà dal proget dal *Onomasticon* dai Furlans, ch'al è daûr a realizâ sot de sorevision dal professôr Claudio Griggio, gjoldint di une borse finanziade dal program *Talents Up* (Marie Curie Cofund), de Region e da l'Area Science Park di Triest.

L'*Onomasticon* al è une base di dâts che ca di pòc e sarà metude a disposizion par internet. Par ogni personaç, al furnis il non, lis datis e i lûcs di nassite e di muart, il cjamp di ativitât, une curte biogra-

fie (cualchi rie) e la bibliografie. L'intindiment al è chel di inzornâ lis informacions e di slargjâ il numar di vôs a pet dal *Nuovo Liruti*. Cun di plui, il formât digjital dal *Onomasticon* al permet ricercjis smiradis che no jerin pussibilis cul *Nuovo Liruti*. Vie pal invuintri di vuê, al sarà spleât ançe cemût che il coordenadôr dal proget *Onomasticon* al è daûr a doprâ lis preziosis informacions contignudis tai manuscrits dal abât Domenico Ongaro da San Denêl, un erudit dal secul decim otâf che in di di vuê al è une vore mancul famôs dal Liruti, ma nol fo inferiôr te cognossance dai leterâts dal Friûl.

Maiko Favaro

